

黎文僖公集

黎文僖公集卷之九

記

應城縣新脩儒學碑記

昔劉宋初置應城縣未置學趙宋謝顯道為令始即縣東百步許建之元季燬于兵國初洪武己酉知縣賈嚴完復故基尋併入雲夢庚申縣復知縣韓子中訓導陳直方重建隨壞天順庚辰郡守周鐸新豎堂齋未幾又災今曠官也巡撫荆襄右副都御史楊公抵縣篤念斯文乃薦前御史左遷臨縣令固始汪侯清移令應城庚寅三月侯來視篆公庶有為第窘旱魃既而湖廣提督學校按察副使蒲田嚴公沚振揚文教武昌道按察

僉事仁和邵公琮肅清風紀遂協心贊畫助白金五十兩以倡於始侯乃捐俸以率官屬節用以制貨財乘時以餽工役義夫禮士咸來効勤富農鉅商恪願供事運材木闢土基礮柱礎陶甓削板榦築垣墉起辛卯之秋迄壬辰之春立大成殿五間高三丈深倍之廣二倍左右建兩廡釐正先賢牌位前豎大成門靈星門各三楹後豎明倫堂五間東西兩齋堂高廣亞於殿齋深濶次於堂凡合食之廬誦事之所祭享之器既稟之屋悉完且美是歲春上丁釋奠於先聖宿燎設縣罇俎豐潔邑侯校師靡懈益虔聖靈在天恍惚來享君子觀之應城文運益昌矣未幾巡撫湖廣右僉都御史吳公適來

行春進謁新廟碩瞻庭廡整峻階序廓宏足愜
而坐講堂考經義冠帶縉紳周旋規矩學者譚
堯舜之治孔孟之教如取諸左右步趨兢兢性
資訢訢唯喆諄諄公乃大悅前縣官師儒而諭之
曰國家觀乎人文以化成天下惟爾知文之在茲
闢闡化基崇懋道本克舉厥職予惟爾嘉爾罔
或不恭凡青青子衿以領鄉薦為貴於舉進士
甲科為尤貴應城甲科前此不乏惟今科連雋
二人其一版行性理策一篇矜式天下是惟爾之
教暨乃之勤然喬木叅天蟠根在地彼鍾靈孕秀
發達顯融與四方豪傑並考究斯學不為無自爾
其懋哉養教雋英益動術業再俾科第倍從前聞
是惟爾躬之華

予亦汝褒有超等之擢皆肅摯稽首願遵憲章公又言
昔魯侯興學頌在闕宮爾等當有紀載衆皆謝不敢公
曰然則盍授簡於太史氏於是教諭彭通踵門言曰凡
為學之道知行兩端而已應城人熟於謝上蔡者若知
其為學乎初年之學繁於致知簡於力行及聞明道玩
物之戒乃盡棄舊習切問近思至于以生意論仁以實
理論誠以常惺惺論敬以求是論窮理而直指窮理居
敬為入德之門兩端竭盡而無遺矣今人人曰上蔡我
師曰我熟於上蔡而不學上蔡之學可乎吾聞嚴公教
條程限書句令學者默而識之務先辨此次及文藝此
最為致知要法程子釋大學亦以讀書講明道義為格

物致知首術雖使上蔡復生必當然之蓋讀書所以窮理理明於心積久有覺由是勉而行焉用之誠意正心以脩身則知所向方用之齊家治國平天下特舉此措之耳都憲公拳拳造就人才所言益勤衍業意正指此允我同志安可以默識為難而不加勉哉汪侯又嘗城縣治闢四門建倉庾廣儲蓄成興梁通津濊凡舊之壇壝置郵祠廟旌門之坊駐節之館警夜之樓悉一新之惟新學乃其大者因紀其大而兼錄焉用垂永久

棲萼同春堂記

楚風俗之醇以竟陵為稱首而上白湖稱張氏焉

國初張之彥有諱清者生一子曰子榮子榮生三子曰

謙曰讓皆隱曰衡游太學未仕今皆物故矣謙生三子
曰九霄九思九成讓生二子曰九疇九鳳衡生四子曰
九齡九鼎九韶九皋而羣伯仲又各有子若孫千指合
爨九霄九疇均失怙恃今存者獨九齡之母高尚無恙
然亦白髮耆壽矣高属九霄幹其父蠱而九霄視高與
親母同諸昆從手足一氣正倫理篤恩誼凡羣弟無私
貨有事介婦必稟冢婦而後行諸子姪不得以世次為
厚薄此其禮法之整也遇東作西成時長者率少者事
其事計倉箱所有為衣食婚姻慶吊均焉此其情愛之
孚也歲時稱觴上壽世母在堂九霄怡愉秉禮森蘭叢
桂肅冠裳而進趨者餘四十人此其慶澤之延也命九

鼎游邑庠勸之務學自發解至登上舍資給無少懈此其禮意之厚也若九昂諸昆季皆克恭厥兄不墜先訓此又其教道之成也天順庚辰春九昂來京師維時京兆丞南郡余孟亨侍書中秘聞其事異之乃取詩棠棣之義題其所居之堂曰棣萼同春縉紳大夫多鳴之以詩而屬予為記此詩周人燕兄弟樂歌而起興棠棣者北以衆華俱發辯辯光明類兄弟之藹藹並秀而華萼相承甚力亦如兄弟之相愛甚勤歟夫天地妙一物以化羣生在春和時物各付物人但見棠棣之辯然云耳孰知化工之神之所寓哉厚地道所以培植其根抵時天澤所以長養其條榦噓惠風暴杲日所以暢達其茂

葉繁華而成實也化工於棠棣且爾況人於兄弟乎守
成範則祖禰之根柢以植蹈仁義則宗族之條幹以榮
積累德善敷遺後人則子孫之華葉實以成就此予於
九霄所以既徵諸禮法之整情愛之孚慶澤之延禮意
之厚教道之成而於斯乃克見其兄弟真棣萼之同春
也雖然周公作棠棣在宅洛之後蓋懲創三監故於赴
變急難懲小忿忽至親懇懇言之後乃極論兄弟之恩
無適而不相須所以懲人道之變感天倫之重也凡張
之子姓登斯堂者其亦視所懲以為戒視所感以為勸
耶至於九鼎進陟顯融有民社之寄又將推其化於家
者化於一國天下耶如是則張之棣萼又將與一國天

下同春不徒然而已也其敬懋之

四友軒記

秦大夫與此君姑射仙相友善方歲莫時冰雪山積天下之物蕭然而獨分我綢繆相與秉虛心抗高節露英華結明於百卉具腓之餘交脩以成君子曰世情交义則敬衰若夫交道有常窮不改素者吾獨見於此易資履澤詩取伐木豈我誣謬因目之曰歲寒三友好事者或繪為圖或詠為詩歌或述為賦傳序而聲名籍籍播天下矚古今矣三友者多寄迹江東南自荆淮以北欲強之來不可得也間寓富川育德子一見之即與傾倒為莫逆交時或拉之賞郊原訪山林豁谷必迭為觴詠

醉則邀與共枕席神偕夢遊興盡而返猶目送久之至
再至三不遽已既而育德子領薦坐師幄於蜀樊門三
友睽違凡數年然春樹莫雲所夕在目久要誼重豈得
忘之乃搆軒宦邸崇深廣各二尋許走書幣招三友與
俱初其聞召亦欲相率遜去有勗之者曰爾輩皆育德
子貧賤交也彼富不棄貧貴不忘賤誠有取於爾以成
厥德何避焉於是以其彙來凡三歲始集既申舊好育
德子喜甚乃正冠裳啓牕戶具酒肴焚香展易與之討
論時大雪初霽几席之間但覺蒼然其色晏然其聲藹
然其氣味鏗鏘頰仰充藹後先而神澄氣爽泰宇清廓
殆不知其身寄一方矣間謂三友曰某不鄙菲薄幸締

交於三俊英三俊英亦特見禮遇茲欲則名輩行間易
美稱曰四友可乎於是皆變而作俛而靜思探易義為
育德子箴大夫曰吾歲寒後彫參天冒雪蓋久於厥道
有得於易之恒者子知所應恒乎此君曰吾淇澳比德
繁陰四時蓋物畜能養有得於易之順者子之所觀順
乎姑射仙曰吾冰玉為骨雪月為魂蓋一陽來復有得
於易之復者子又知所休復乎知斯三者吾增爾與游
育德子乃再拜謝曰某辱知於衆賢茲又獲備聞至教
敢不惟命是承敢不由此勉進朝夕於是扁其軒曰四
友自來京師告其事於樸菴先生先生聞之喟然太息
曰噫此皆吾十載前忘年友也物色之久弗獲茲乃結

金蘭於子乎子必有大長益矣歸為我道意衆賢今公道夫亨若徂徠取材若嶰谷製律若南廟薦昂衆賢其敬懋焉育德子請記之遂書以為記育德子姓葉名芳字庭蘭今分教舞陽云

黃州府重脩廟學碑記

入湖藩首臨黃郡謁黃郡諸公署首登郡學其大成殿巍然高峙冠冕一方左右兩廡前豎戟門又前豎靈星門崇廣一遵今時定制質文兼備甚宏麗焉其明倫堂偉然端坐擁護前殿左右列兩齋後為膳堂為祭厨官庠為弟子館為倉廩又畧倣大學規矩品式全俱甚整齊焉遠而望之丹青輝煥如瞻闕里之宮牆近而即之

禮度詳明如見右壇之制作可以尊祀先師啓迪後學
傳之萬世而無斁矣惟茲廟學古書院故基也舊皆傾
圯今一新之誠有大功於斯文舉其綱者承制巡撫湖
廣資理軍務都察院右僉都御史繁昌吳公輿壁振其
紀者布政叅議晉陵劉公庭實按察僉事仁和邵公叔
璋經營其始終而成之者前邵守嘉興俞公誥今邵守
上海王公霽助其力者同知李侯恒通判張侯英龔侯
鑑推官余侯賈董其役者郡幕賈廣陳琮教授汪高訓
導夏璿林勝造端於成化辛卯之秋畢事於癸巳之春
邵憲公乃諭曰斯舉也當銘其德以告于太史氏有其
人乎于時僉事邵公曰當請于華容黎淳遂遣使來惟

黃郡淮楚要衝江山萃秀昔我

高皇創業時則多武將從征四方後暨

列聖守成時則多文儒颺歷中外惟以地之靈鍾為人
之傑焉耳然而氣質不齊事業亦異必有待於學校之
教然後暴者化為仁邪者變為正昏懦不立者改為聰
明才辨各得其中醇而無疵也今幸貞元會合國家太
平之治薰蒸百年氣化澄清又幸都憲公暨羣諸侯仁
厚之政睦雍千里風俗醇茂賢才生於斯時有足觀矣
冠帶縉紳來游來歌得盡納大川崇阜之英華聚於學
宮悉為時用安可不務學哉然所以學之法何如今提
督學校按察副使莆田嚴公宗源之教條量學者資性

高下程限書句令其默而識之次及科舉文學而默其
幽陟其明蒐揀俊良供給國家此其要也若等而上之
性敏者既治一經又兼通一二經游觀子史百家資其
法程立我名節為古者功名之士此其優也又等而上
之貫通五經而博於文踐履五常以約其禮上師周孔
下友顏魯為古者道德之士斯尤其高品者也天地之
氣運無窮學校賢才之出亦無限黎淳誠不敢謂黃郡
乏其人而畧為願碑此以俟衆遂以復於都憲公銘曰
惟黃建學章故鼎新曷以致茲國有其人穆穆王宮神
綬爵位樽俎籩豆嚴宮歲祀潭潭儒室士履典常鼓鍾
經史浚發福祥人在春風物沾時雨乘時奮興雲龍風

虎當其無事爾養厥中官守言責蹇蹇匪躬其或有虞
爾身徇道臣蹈義忠子全節孝觀文成化四海永清
天子萬年吾道大行

平荆襄碑記

皇帝為乾坤宗子賢大臣整頓乾坤為宗子家相共施
一仁生養萬姓延景祚於萬億年惟荆襄之交有地數
千里崇山迢迢東連漢沔南通蜀北包唐鄧西接關陝
土沃民稀人跡罕到為四方逋逃淵藪
國初平定全楚置其地於寬仁之中禁網踈闊近百年
來民避租役潛聚山林間動以百萬計物衆地大孽牙
其間驕玩我兵嗜為寇亂

皇帝元年之秋已命今少保兵部尚書白公總戎撫寧侯朱公平之矣大憝適去稂莠未薈安養既久禍難復萌六年冬逋寇李鬍子小王洪王彪輩再出為亂憑負丘陵布張驚猛放兵四劫敢拒我師巡撫右副都御史楊公以聞兵部請大興兵一舉滅之

皇帝曰嘻惟天惟

祖宗既全付朕有家民茲失業遘難輯寧在朕毋養亂毋助變惟朕一二大臣孰蕪文武其命往仁斯民兵部曰惟右副都御史項某嘗提兵討西戎有功惟茲克堪詔曰然遂勅公承制總督偕總戎平蠻將軍右都督李公量徵近兵遏絕亂畧凡廷臣聽公自擇以隨仍命湖

廣右僉都御史吳公給糧餉公於是陳便宜數事請頒
聖諭榜文散其脅從遣監察御史劉索助分理翰林檢
討張寬資贊畫皆見允納公以十一月丙申陛辭面承
天語賜白金綵幣錫燕光祿燕程以進十二月癸亥抵
襄至即鏤榜頒行聽賊改過遂合總戎叅將暨梁楚二
藩方伯連率議攻守之策時兵食尚寡既而吳公飛芻
粟官吏雲來犒賞給費悉辦無闕仍移書區畫兵力乃
備居頃之王彪授首公乃以土漢官軍三萬餘分十有
二哨委副都御史楊璿叅將王信千戶吳綬叅議段慎
等督穀城御史劉索都指揮林深等督內鄉檢討張寬
都指揮柴政等督遠安都指揮王英叅政甯瑛等督南

漳都指揮李振副使余洵等督竹山都指揮李瑾叅議
王汝霖等督嵩廬都指揮吳榮叅議崔忠等督洛南都
指揮錢貴叅議楊璧等督漢中都指揮唐聞叅政余復
等督大寧授以方畧屯據要害以堠公暨總戎黠武是
戒猶懼孤

朝廷仁民之意重選信使賁榜遍歷谿峒告以兵期開
諭勸導至再至三於是民之罪所自犯兵不得已其海
悟出山者自冬徂春凡六十一萬有畸遍給口糧資送
復業三月癸巳穀城謀報小王洪聚衆五百餘駐均之
烏頭山公偕內侍常貴督兵進取一戰擒之斬獲殆盡
庚子竹山諜報李鬚子聚衆六百餘劫掠官渡等處公

即募勇敢厲官軍分道進取又一戰擒之誅虜大半二
首惡就縛遂收家屬兵仗餘衆鼠伏鹿奔遣人招之莫
肯來歸公告總戎兵威既振弗谷中遏遂戒嚴各哨三
令五申冒暑涉險刻期並舉以四月朔最鋒司空山蹕
之掇倒驢山大靛馬良坪颶驅電掃所向無前又資送
三十三萬一千人出山盡斬迎敵者梟其首擒附賊弗
還者三萬人悉宥死編管各衛所從軍時大憝既誅殘
寇遠遁衆難於饋運議為後圖而吳公區畫糧餉適至
公遂移營竹山招山棚之號射生尤雄桀者四千餘至
營宣示威福給帖賜糧資遣復業惟白土關唇齒關西
逋寇尤盛乃大閱兵以七月丙申覆賊巢悉斬首惡俘

家屬兵仗孳畜乘勝長驅窮寇遠討直臨陝之漢中等
縣蜀之大寧等處大會諸軍撫順誅逆又資送五十萬
三千七百人出山八月丙辰旋師均州養銳息兵內侍
常公來議汎掃適劉索擒萬家坪賊九千餘張寬擒麀
鹿洞賊五千餘并兵仗偕來賊勢盡敗九月戊戌公駐
節荆南衆告火龍關民窩賊取富劇盜仍假王李舊名
劫掠不悛公謀於總戎周俾遺育乃重督兵歷內鄉浙
川等縣圍圍衝要進兵二千里餘磔李恭等於火龍關
桔王安李榮於石盤嶺械王通楊彪等於司空山諸處
皆勅敵也擒賊黨二萬餘悉宥死配隸各衛所是役也
窮山深箐馬跡不遺封豕長蛇隻足無馭自禡祭至凱

還以成數計之廩送復業凡一百五十四萬八千七百
餘生擒首惡凡一百三十斬首凡一千九百二十俘獲
黨賊凡八萬九千七百九十編發充軍凡四萬八千九
百三十山谷一空數千里間按堵無事夫流民皆吾赤
子也今流者還則賊勢孤我得以宣威有仁之慈惡者
誅則兵令行彼不敢肆惡有仁之勇梗化者編軍則民
免濫殺之暴朝廷獲補伍之益又有仁之政術豈惟
畧當然於大臣仁民之託無纖負矣事聞

上大悅賜勅獎賚陞賞報捷獻俘使者公又圖為經
久之計偕總戎合議上陳十事一防流民入山二禁竊
礦三建立司堡四立所守禦五防慎隣界六照舊漕運七

裁省官員八政體歸一九委任責成十減免稅糧詔耶
行之昔三代盛時田皆井授而又馭以八統任以九職
繫以九兩安以六本民雖欲流安所往哉自井田廢阡
陌開豪彊庶併民雖定業流亡始多矣漢唐流民猶可
威制惟晉法度蕩然李時王如遣還甚易李泌羅尚納
賂請停卒之竊據一方為無窮禍用非其人乃如此然
則今之流民弗鑒往轍而罪遣之豈善治乎黎淳嘗秉
史筆供奉翰林其歸寧也荆襄郡侯校師將吏卒鰥老
童孺踵門告曰凡銷患於未然者易滅裁於已然者難
蠲茲流民若待勢成乃討之雖有十萬之兵莫能措手
幸賴總督公之雄才總戎公之成筭巡撫公之力贊就

此大功敢以碑文請黎淳曰公之功在國史公之恩在人心烏用是為衆曰不然夫法垂於後則思之愈衆且久將使後人有所矜式也黎淳不能難遂為之記總督名忠西浙人總戎名震河南人巡撫名琛南京人皆慷慨有大節可屬大事系以詩曰

明承天命百載輯雍孰藏近地襲盜逞亮

帝嗣丕圖布昭神武四征弗庭誕懷疆宇既梟廣粵遂斬蜀氏東夷西戎次訖天誅惟茲逋逃已寧復亂謀夫獻奇武臣思奮

帝曰俞哉命我項卿往偕李師仁義用兵公拜稽首曰茲臣職師克在蘇臣敢弗力公馬北來矛戟林林總戎

莊止將相一心窮簣遂林齊飛萬騎有穴有巢險危失
據仁撫其徒義戮其遠天討則然公亦何私昔公未來
鳥驚獸駭川澤沸騰林園失彩今公來恩千里肅清山
畎澤猷禾黍菁菁闢有固封租無厚稅家文室男祝公
千歲公歸朝廷

天子股肱高爵答勲公敢不承公在朝堂法垂我楚大
史琢詞訓于千古

竹隱堂記

金谿縣治北一里為迎恩關關之東有高阜全宗琦家
焉高阜之下多脩竹蒼翠鬱鬱東連鷓鴣嶺南帶卓筆
峯望之蔚然可知靈秀之萃於斯也宗琦作堂竹間環

疏逕路導引泉石東樹小樓貯古圖書於焉藏脩樂臻
壽考功名富貴付命於天古謂隱居求志此即得其地
安所寓者因字其堂曰竹隱堂焉客有北來者予問之
彼或言君子寄興於竹不可一日無此君宗琦愛竹故
耶此居之或言竹肖德於君子渭川千畝其人等千戶
侯竹誘宗琦故招之使肥遯無悔予曰此二說皆非也
謂宗琦愛竹則是人徇物非所以離塵俗之偏謂竹誘
宗琦則是物移人亦非所以由道義之正人與物異類
而同理子不觀乎竹本固固以樹德則堅定有常竹性
直直以立身則中正不撓竹心虛虛以體道則寬廣能
容竹節貞貞以幹事則砥礪無玷竹種蕃蕃以昌後則

胤嗣多秀蕙此五善夫是之謂竹隱然則宗琦其竹乎
竹其宗琦乎吾見斯堂麗日月而涼陰來臨風雨而幽
響作援琴鼓之清音中乎律呂呼酒酌之翠靄拂乎樽
壘簡編舒卷雅趣悠揚詩律涵濡得其韻味消百慮於
目前謝世紛之牽制飄飄乎若將超於物外竹有益於
人豈淺淺哉彼繁榮豐盛發於一時而蚤瘁落者又烏
可同日語耶雖然知竹之隱不可不知竹之顯隱顯一
道也蓋竹之為物裂而簡之可垂聖訓鏃而箭之可征
不庭此文武無用也又割而編之為箴席可饗宗廟截
而穴之為笙簫簧管可和人神此禮樂並行也魯謂立
其體而可不適其用歟此則在宗琦起而圖之不然所

以託諸子孫亦可也翰林編脩徐時庸曰宗琦先世家錦繡墩中惟兵燹遷朝天坊宗琦再奉其父別業於此吾游鄉校時常館焉若先生言可謂曲盡其實非或人所能知者請書之以告于後人

袁氏復祀先塘記

人道以親親為本孝子慈孫欲壽家慶於無窮則凡祖宗舊物皆當敬守而保全之此親親之大者也豐城荷溪袁氏自宋崇寧中有袁二府君者為始遷祖族鉅以蕃迄今不衰袁二偕厥配熊既歿遂分塋坑口東西而新塘實介其中厥子蘊王經營墓田愛其蜜邇先營利足以供歲時祀事也於是決壅救補缺漏增脩濬導積

柴養魚以貽後昆而塘亦以袁姓焉世變以來物在人
亡塘之主屢更而袁氏子孫猶綿瓜瓞其世澤本厚故
耳仰惟

國家安養生息胤嗣益昌袁二十二世孫秉常擢高科
為校官擢名御史陞知太原府間奉

命歸省一新家廟而塘未暇復此亦地因人勝物之往
而復還固有時乎秉常從子今武平令勗仁袁之善繼
述者天順初嘗省祭家居每睹斯塘輒一興感於是圖
為葺理倣舊制而完之又恭作盟書戒飭族人著為儀
式昭格祖禰於戊寅歲首率宗人少長醵飲家廟之偏
相與定謀協志永示成規誓約既成乃取塘之魚詣祠

堂修祀禮以祭始遷之祖棗盛既備為文祝之而以六世祖省一慶七八世祖順一順二順三回四配食以大宗適子主祀以各支小宗子分獻焉退而享餼事燕毛序蔭昭穆秩然於斯時也祖考之靈洋洋鑒格子姓具在敬恭奉承報本之義明愛親之仁篤惇宗睦族之道著皆斯塘之復預有功也薦紳士間播諸詩歌而勗仁屬予記之古者卿以下必有圭田圭田五十畝以奉祭也而猗與漆沮周頌歌之季冬薦廟月令謹焉此皆取魚以致其孝者古之人所以達孝於天下而俾人臣各行其志願者如是漢唐以來此禮廢矣士君子欲遂其尊祖敬宗之私則不待上人錫予而自為之制若陳居

仁之義庄范仲淹之義田蓋存什一於千百亦可見親親之道無時暫息也夫禮固可以義起矣之家慶由秉常而興由勗仁而益閎以遠且復斯塘蒸嘗取給義例嚴規模遠誠意懇惻爾袁子孫富強者烏得併吞貧弱者烏得質鬻可不知所世守哉昔韓宣子宴于季氏有嘉樹而譽之季武子曰敢不封植夫樹非塘比也古人猶胥保護況取時物以奉先之地乎爾子孫尚克重之繼述不忘則親親恩薦而孝子錫類之慶尚於將來有徵焉遂書為記

樂義堂記

天下之樂無窮惟主乎義者為真樂蓋主乎義則無入

而不自得其為樂孰大於是樂而不義彼之所樂吾之所憂也昆陵蔣文聰好義者也其為人樂施予景泰初歲屢告飢有司行勸分之政文聰嘆曰家有餘粟野有餓殍而不救之非義也乃輸粟數千石上之官

天子聞之喜曰此吾義民也予冠帶以榮其身守長貳曰此吾邦義士也吾以之激勵風化文聰曰是善名我固當因是而究其實矣遂援樂義名其所構渦溪之堂屬進士白廷儀徵予記昔者孟軻著書教人守己曰尊德樂義則士得已吾可囂囂耳今但施惠足以盡其義乎吾聞文聰家居惇孝友之行庭闈色養融融一堂是義在父子可樂也手足怡怡相友相善是義在兄弟可

樂也至於宗族分形恩禮周洽鄉閭聚處利澤必厚且
義在宗族鄉閭又可樂也暇時葛巾藜杖逍遙林壑坐
茂樹以命酌臨清流而賦詩俯仰天人無愧無怍起居
適趣隨寓而安此則所謂主乎義而為天下之真樂也
義之有樂孰加乎此吾又悲夫世之人後志於物而忘
其身賢者以功名為樂而不知功名非義有後艱也不
賢者以富貴為樂而不知富貴非義終難保也故謬戾
膠擾得失紛紜千日之樂不足以敵一日之憂文聰今
樂乎義其能以道德為樂歟夫道德之樂聖賢所同孔
子蔬食曲肱顏淵簞瓢陋巷皆以為義而自有其樂文
聰能晞顏而學乎孔子也哉此又進其真樂之大者子

歸而求之

北窓記

黃巖項崇清氏世家桂枝坊之南間闢舊居完美一堂轉而負陰嚮陽以仰事大母暨繼母俯育諸弟子孫因竅其陰為牕櫺以納明爽有餘力輒嘯詠其下身雖在人境而心實超然自得也好事者多為詩詠之里嫻趙貴文徵予記昔晉陶淵明少有高趣窮居養親種五柳以自適令彭澤八十餘日即解印受託酒以逃夏日高卧北牕下清風颯然自謂羲皇上人而崇清亦少而穎敏業文藝志功名然以先翁齒成均中逝遂嘉遜專以孝二母慈諸幼為職樂志北窓存心千古豈有得於淵

明之流風餘韻而興起者乎夫羲皇之世去鴻濛未遠
其穴居野處之民搏生咀華與物相友無有介傷之心
卧則呿呿起則吁吁蓋渾渾如靈噩如焉耳而靖節之
見幾而作安貧守節其在北牕惟念黃虞以遐邁揖綺
角以冥棲窮達死生皆靡攸慮終至於憑化以遷託體
山阿了然閔達而無累則其與羲皇之民誠一致也至
於崇清惇素養浩樂其家慶等富貴於浮雲視功名為
外物頽仰天人無愧無忤而一惟彞倫之是叙其北牕
與靖節之北牕又豈有異趣歟夫孰謂世變日下後之
人不可以儷美古人耶雖然自常情觀之靖節之在北
牕蓬廬空視幾乎營木為巢也茹菊延齡近乎採木為

食也園田守拙與樸畧之風一也塵爵虛壘與陶匏之
器同也高舉遠引遺世獨立天即淳龐端慤不忿爭而
財足無制令而民從之遺化也崇清又克心靖節之心
而樂其樂此其形迹固無差殊矣子則以謂觀其形迹
之同不若究其學術之同夫庖羲氏之王天下仰觀俯
察開物成務實啓萬世聖學之原靖節欲魯叟之彌縫
則識圖畫之真傷六籍之無親則悟書契之妙絃別鶴
孤鸞之操則立基之命離微之曲千載一意此靖節北
窓之學誠有得於羲皇之學真西山所謂淵明之學自
經術中来者是已學術同則心術無二道然則崇清學
靖節之學是亦羲皇之學心靖節之心是亦羲皇之心

故曰誦其詩讀其書不知其人可乎是以論其世也是
尚友也崇清北牕之詩鏗鏘金石於寫景詠物已詳予
因舉其學術與心術記之蓋亦嘉其為人而進諸道德
云耳文藝云乎哉

一經堂記

聖人立言以輔世曰經諸子之言為聖人所取者亦曰
經經者天下萬世常道也大之立天地叅化育植綱常
微之通鬼神窮性命談氣數顯之秩政教序民物昭禮
樂文章外之紀山川載鳥獸草木辨蠻夷戎狄之等要
其指歸皆不戾於道而可傳後世使學者格物致知誠
意正心脩身齊家治國平天下昔漢常長孺五世為鄒

魯大儒其子玄成明經拜相人稱之曰遺子黃金滿贏
不如教子一經良以是歟脩江黃先生邦節子侍先大
夫為縣時家塾師也厥尊南濟川翁洪武初嘗游鄉校
授詩於訓導麓隱程於敬後丞湖之長興而先生嗣世
亦授春秋於鄉達東平訓導王凝輝徐聞令進士石彥
誠兩膺徵聘纂脩郡誌紀述惟當歲時鄉飲酒禮必請
為大賓邑大夫有疑政必造門質問學行純雅為鄉人
楷範今先生子文振又復游鄉校授書於教諭莆田吳
公榮膺薦升胄監寢歷優仕蓋凡閱三世各以一經顯
也先生愛重其世澤於是取漢人所言扁其家居之堂
曰一經堂命文振求予記嗟夫世之人愛其子者皆思

有以遺其子然欲貴者遺之以位欲富者遺之以財殊
不思矜高侈肆者傾覆之階多藏厚斂者怨尤之府雖
曰有位有財幾能使其子守之而不見取於人乎此常
氏識量所以高出漢人而今又見取於先生之門將使
大江以西凡有家者皆知以經訓遺後其於名教豈不
亦助哉雖然道無終窮學無止法黃氏雖世守一經而
道則備在六經也君子博學六經乃足以窮萬事之理
而主敬又窮理之本凡欲造斯道之極致必也二者兼
備斯為盡善焉黃氏子孫登斯堂者尚思體驗擴克不
可自棄有自棄者非良子孫矣

重建登州府儒學記

正統紀元之十有二年永康侯徐公安欽承

上命總督備倭逮帥聞於山東之東牟維時廟筭先定
將德懋彰藩屏屹然邊方寧謐武功既舉文事乃興遂
擇吉月偕巡撫山東刑部尚書薛公希璉恭詣廟學祇
謁先師退而進立諸生秩序禮文講說經史顧瞻殿屋
隘陋廊廟傾欹庖厨廩餼俱就簡畧大懼職業弗舉以
墜教基於是將相叶謀慨然有作新之志鳩工簡材損
舊益新專委其事於郡守齊安汪公鑑俾改作之鑑素
儒者亦以興起斯文為任考工按度克慎克勤布置經
營具有程法自靈星門至大成殿自明倫堂至東西四
齋凡為屋四十二間兩廡迴廊煥然一新庖廩垣墉畢

完畢美經始於景泰六年正月落成於是年八月仰觀
聖容殿陞輝煌衣冠進趨濟濟乎與賢之淵藪矣既而
汪公丁外艱去而山陽韓公敏繼之亦善振起凡東牟
君子瞻聖賢道德之光華莫不肅然起敬況其堂入
其室得所依歸者哉汪公來京師乃列狀求為記惟東
牟之為郡憑山附海僻在東陲地志載其民多朴野性
曠直猶有古風質多文少其信然歟然而為唐嚴刺史
宋蘇翰林宦游之邦德政所綏懷文章所漸被流風餘
韻猶有存焉迨我

國家深仁厚澤養育百年民生其間感化於變又得方
岳大臣作新鼓舞使成德達材有其地釋奠釋菜有其

所隆師親友得其道則感慕興起化衆大猷忠君孝親
之道以立輔世長民之德以脩格致誠正脩齊治平之
學以顯士子掇巍科躋膺仕者文質彬彬後先疊出其
有補於名教豈淺哉昔晉作三軍謀元帥趙衰曰祁穀
可臣亟聞之矣說詩書而敦禮樂詩書義之府也禮樂
德之則也德義利之本也若徐公之建學非說詩書敦
禮樂歟漢文翁興學蜀郡文教大行伏恭脩學常山北
州成化若汪韓二公之為政又非文伏二公之遺意歟
是皆可書之俾勵俗今日垂勸後來矣然則繼此而游
歌其地者尚無忘四三大臣作興造就之遺愛益圖奮
發以侈大其功名事業則有以壽斯文命脉於無窮而

吾夫子之靈於昭於天者亦即此常在焉其敬最諸於是據事有書凡相其事者皆可嘉尚列名於碑陰

義烏五賢祠記

秦孝子顏宜宋東京留守贈觀文殿學士謚忠簡宗澤
汝霖太常少卿謚文清徐僖子元翰林侍講學士脩宋
遼金三史總裁贈中奉大夫江浙行省叅知政事封江
夏郡公謚文憲黃潛晉卿大明翰林待制贈翰林院學
士奉議大夫謚忠文王禕子克此五賢皆義烏人其生
平履歷皆已具國史矣而祠事曠遠無以妥明靈發幽
光示永久也郡志載隆興甲申知縣事晏節嘗建忠孝
祠於文廟西廡祀顏宗二公後又附以呂成公徐文清

公徙於戟門右尋廢未樂辛卯教諭吳春同析為二祠
忠孝祠在戟門東南邑人吳彥善建其祀仍舊尊賢祠
在戟門西南邑人王仲宗建祀呂徐黃王四公尋亦就
荒正統庚申縣丞劉傑請于

朝重建忠孝祠移王忠文公入祀徐黃二公不預斯亦
豈全禮哉大順癸未春按察副使東吳張和節之奉
命來督學政釋菜之暇顧瞻祠屋傾圯圖復新之而生
員王汝忠文公三世孫以故基告公遂捐俸為倡命教
諭歐陽傳領其事鳩工簡材經營唯謹于時知縣高震
主簿張賢訓導郁球各勤贊襄乃合忠孝尊賢為一祠
建於文昌祠左正堂三間深十丈餘高二丈六尺門廡

九門高廣次之繚以周垣環植樹木像設土著五賢於
內各據史志錄其傳板于壁間春秋致祭焉經始壬午
四月落成次年六月名曰義烏五賢祠呂成公金華人
別立祠移祀郡城中於是百年廢典一旦復興名教植
立吾道有光士之景仰前休者咸起敬慕可謂有功斯
文矣汶升大學因求記其事以傳遠惟義烏為金華壯
縣直牛斗故墟地富佳山水今其石樓湧翠繡川涵輝
靈秀鍾完名士輩出若五賢之表見於世固皆有由然
而說者謂人之才賢靡不資於土產其信然乎予猶以
為未然若五賢者雖其地靈所萃要皆天理在人心不
可泯沒而又有賢父兄有良師友克講學以明其理焉

耳父兄師友俗尚所關講學明理術業攸正是故本天
理以為孝則仁愛備本天理以為忠則節義全本天理
以弘政教脩文詞納章䟽論議則皆有源有委功名振
卓天理在人心者烏可少忽哉今是祠之建憲副公又
擴其天理之心光起前烈以師後學則九冠章甫衣逢
掖生長於斯預聞吾道者可不追攀往轍亦皆講學以
明其天理在人心者求與之匹休乎惟忠惟孝有文有
行以名當時以顯後世吾黨之士其敬懋之抑予又聞
天之生賢不隅而地之降神無窮五賢表見於世固其
宜者然今太平日久深林大谷間獨無聞五賢之風而
興起者耶若進仕者退隱者殉名之士將爭趨焉彼藏

脩林堅考槃自寬無求於時天理內足者是亦義烏之
逸民可以列名祠中流芳後世為政一助也然此觀風
使者之事汶歸謁憲副公尚以予言告之

重脩汲縣儒學碑記

大明植綱常以建民極以豐亨泰寧之治於百千萬年
凡作新表率引掖勸導之方一惟賴學校為之根本也
學校之隆替繫有司之勤惰此數年來

詔旨丁寧簡懋懇切然或連十數城無絃誦聲豈非司
牧者乏人而師道慙歟其或一二庠序子衿雲集俊登
賢能者歲萬萬彙征則必有良師帥暨賢博士為之興
教化以成就之矣魯作泮宮詩人頌之蜀起學舍士尚

文雅豈無自而然哉汲為縣附郭衛郡舊有學在縣治西北隅隘陋岑寂非陶範英賢之所國初遷學于東北隅即三皇廟舊基為之易飭故宇建大成殿三楹暨兩廡戟門高廣明爽士有正業而歲久傾圯前尹邑者委而弗葺禮文以缺士之勸駕于郡者亦鮮天順己卯秋廣平盧侯來為令始至釋奠先師顧瞻頽敝慨然有興舉之意間屬訓導史顯謂學廢教弛無以塞責於是捐已俸一年為倡繼而僚佐官屬悉來貲襄儒師弟子咸願助役下至耆民義夫亦皆樂於趨赴伐石冶鐵陶甃市材百工信度羣費咸備乃撤其頽並手偕作首葺大成殿規恢舊制而一新之次建東西廊廡及內之大

成門外之靈星門并齋舍饌堂整備如儀培綵聖賢像
貌完備祭器環植樹木繚以周垣凡豎屋三十餘棟費
緡幣踰數萬緡經始癸未八月落成是年十月宏麗尊
嚴觀者起敬回視舊作巍巍乎不可及矣學宮既成侯
乃寬徭役豐既烹簡進民間之俊秀而督勵之朝夕撞
鍾擊鼓絃誦洋洋士之歌鹿鳴與計偕者已權輿於此
其盛矣哉明年春昱移書來徵記惟古者帝王建國君
民教學為先士君子惟患無其地以講明綱常之道用
淑其身推於人耳今爾汲幸際

聖明之世八表清和無干戈水旱為民疾苦又幸而得
賢令長開大禮法之場宣明教化納爾士民於善道則

凡藏焉脩焉息焉游焉凡有事於斯者可不知所務乎
夫禮重師嚴民乃向學易端蒙養聖功伊始繼今坐鱣
堂而設科者端肅表儀傳道授業陶鑄此綱常使一出
範模之內是師所以善教者在此立門雪而執經者尊
奉訓辭遜志時敏身體此綱常使不越規矩之外是弟
子所以善學者在此至於風靡庶草波潤一方凡人士
汲產者闔境環繞而內向又皆觀感興仁興讓知綱常
為已分內事而不違焉是四方所以化成者亦在此然
則斯舉也寔克扶世教清士流俾才俊衆多出而建功
名事業於天下而朝歌故俗亦因之復還醇雅其所關
繫鉅甚吾黨之士幸相與勗之侯名信字廷瑞為吾榜

中豪傑其治縣廉勤公恕孜孜愛民他於勸農桑湖田
野均賦役恤刑獄節財用葺置郵復流亡化凶暴具有
科條部使者已聞於

朝請賜重書旌異駸駸乎顯融光大斯舉乃其善政尤
美者凡助其後即為有功鏤姓名于碑後

重建合州城碑記

先皇帝夫縱聖神以人立政於守長尤加重乃復辟紀
元初親擢進士甲科三百人而遴選其通敏有器局廉
正識治體者俾分牧諸郡縣急先務也進士登名龍虎
其恩榮踰越常典而志願高出衆流既尹一方靡不竭
忠以達功名興事業圖報稱也若今蜀之合州守雲間

唐侯珣字廷貴是已初侯既視篆適蜀土侵漁成俗民窮且病侯砥柱中流守冰蘗以率下寧失諸侯之愛無傷小民之心久之頽波稍振始克自立乃課農桑脩學校鋤強暴削吏蠹斷冤獄節冗財葺公署壇廟館舍之廢壞者州治偉然屹為川西巨鎮矣天順壬午盜起峨眉而延蔓資簡遂寧間三川騷動維時諸守長或戮或竄或就擒獨合州以有備不敢犯蓋侯恩信素結人心而威力又足以制其命耳然侯自計恩享一時或不能備後世威振一州或未可及遠方一日率僚佐出飲釣魚山晚登純陽而眺焉慨然有千里金湯之志乃聞于朝請作城池為經久計詔從之舊有城相傳元季明

玉珍遣人創築非也按唐置合州時已有會江樓則城
非元季始矣侯周覽故基惟北面僅存東西南悉已夷
為民居於是度閑曠之地築室移民而役三千人伐山
採石陶甕簡材重建州城周迴二千九百二十二丈三
尺高一丈七尺基廣一丈五尺上徑一丈二尺東南濱
江西抵侯溪北據瑞應純陽二山券石為十一門東曰
迎暉廣濟望江西曰洛陽講武觀德南曰阜民育賢會
江北曰迎恩瑞應門各建鼓角樓各為三簷高三丈
有時經始於癸未七月落成明年三月官不費而財備
民不勞而事集蓋自是合始為完州矣學正章敬馳書
請記惟太史氏樂道人善謹叙其事告於蜀人曰今

天子仁聖克為爾民立賢州長爾州長又材傑克為爾
民設茲天險皆千載一時也今使爾內守外禦有維城
之基凡官于斯脩文事講脩武者各得效職業旁制屬
邑無寇攘之警非賴斯城乎使爾城郭溝池以為固四
民得安其生子得以孝於親臣得以忠於君兄弟夫婦
朋友各得行其志非賴斯城乎使爾金墉鬱其萬雉凡
騷人墨客走傳乘輶登眺於茲得以覽水光挹山色舒
暢鬱湮嘯歌風雅非賴斯城乎易曰重門擊柝以待暴
客蓋取諸豫侯有焉詩曰無俾城壞凡官於斯及爾民
皆不可忘也

天子之德託州長以宣布州長之德在爾民及子孫之

心爾克保之則此城暨爾子孫可千萬世也爾敬圖之
子榜中得人最多學正又予故人請以此勒貞石凡相
其事者皆可尚也列名于碑陰

鍾英樓記

天地之英華發於山川而聚於人天地之性人為貴也
英華聚於人則必成鉅族必產賢子孫人於英華又念
其所繇來益保重之俾聚而不散則衆天地為三才術
慶於無窮矣姑蔑之徐自唐季已家開化之芝田沂流
尋源其八世祖庭鶴宋咸晚七世祖能一元山長六世
祖貴三元教諭貴三之後堯佐亦元山長今崇明令廷
章高祖也曾祖弘原

國朝衢郡教授祖茂芳父用常皆隱居積善姓遐愈昌
芝田據邑中土徐之宅又在芝田正中廷章乃選宅中
勝地作樓三間挹攬地靈暇日拉客登焉則北峙覆釜
雄蹲以待南迴鳳凰翔舞而來左環金錢右擁卧佛爭
奇競秀畢集軒檻而金溪一水繞覆釜背東北過金錢
又南過鳳凰而西下乃經沅也又一溪繞金錢背東南
會于金溪又一澗出覆釜西北過卧佛東南入于金溪
皆支流也四山列侍以相親三水會同而為一斯樓皆
得專而有之宜誦焉爽氣靈光溢滿篇帙宜觴焉清輝
瑞彩浮動鱗壘宜嘯咏焉嘉斯美景助興趣隨所取
之松濤竹雪韻諧瑟琴霜梅水味飮文賦錫祉降祥

輒為子姓以忠孝以友恭以信義以節儉廉耻天賦地
載人率行之實皆有賴於山川英華之所聚也廷章樂
斯樓有功徐氏如此遂揭扁名之曰鍾英來京師請記
惟太和絪縕萬物化醇天地間有是實氣必有是實理
理乘氣行無時間也今鍾四山三水之英為徐氏無疆
之休誠美稱矣無寧專主於氣乎必也有理主之其氣
乃實易言重艮為山思不出位習坎為水常德習教禮
言山雖一區其全體則草木禽獸寶藏之皆興水雖一
勺其全體則鼃鼃蛟龍貨財之咸殖是即山川實理之
可驗者君子既鍾其氣必體易道之有常明禮道之至
誠無息人物一致焉則將悉稟山川之靈為物之最靈

盡收山川之秀為物之最秀其鍾英乃躬踐實理以運
行實氣積而為博厚為高明為悠久英華尤大不專主
於氣也斯又繫於學問之功之所致徐氏子姓其勉圖
之廷章穎悟篤實德學兼優領天順己卯鄉薦訓導永
豐教有成效陞知潮陽縣政蹟卓異今調崇明海內縉
紳士知樓之勝者亦皆有詩彙為一集云

洗心處記

蜀藩儀衛副山陽顧用孚闢其家正寢東西隅各構一
藏脩室扁東曰容膝所西曰洗心處而以洗心處託吏
科都給事中徐時傑請予記予因披拾古義訊於時傑
曰昔者大易未作此理已具於聖人之心及其既作則

著之德圓而神卦之德方以知六爻之義易以貢聖人
體具三者之德以此洗心退藏於密寂然不動入莫能
窺也聖人自然合天心猶待洗賢人勉然希聖心豈無
繫然則用乎之心所以洗濯者何以致力時傑曰戴天
履地靈於萬物者為人聖人人之至靈者聖人之心與
易同體方其靜時太空雲歛朗照孤蟾滄海波恬澄凡
萬象而易之理融會於心著之德湛然虛明之府神是
以知來焉卦之德皎然神靈之宅知足以藏往焉六爻
之義動容周旋於聖人左右無卜筮而知吉凶聰明睿
知得其理而不暇其物皆易道預洗聖心故爾用乎其
心聖心者歟吾往年家食時見用乎為度以度此室縱

得一而不足橫越四而有餘粉塗三面䟽北為牕外則
秦大夫相君子與向陽諸友競發英華內則清商絃紫
電鋒與文房衆寶各儲靈異日拉二三金蘭列坐其中
紬經繹史明善復初而用手凝神千古惟洗心是務肅
敬其清泉也用之澡雪以袪塵埃至誠其沙石也用之
磨礪以滅汙迹和厚其溫湯也用之涵煦以養神靈聖
人作卜筮教人而用手齋戒洗心如是亦庶幾明天道
察民故不失為聖人徒也洗滌既久人泯天定風波不
我撼鴻鵠不我誘雲蘿不我拚牛山秀而木長出子車
之仁義焉五藏潔而文顯生太白之錦繡焉辭賦成而
性在見廣平之鐵石焉而又用手之心因洗獲益所以

致希聖之功彰易道也予聞而嘆曰噫嘻用孚有此其
賢於衆人遠哉昔大舜精一執中以道心制人心實開
萬代心學之源後世一洗而得湯曰日新又新再洗而
得孔子曰明德新民至杏壇繫易悉發天地之蘊以示
人而其要不出洗心一語可謂深切矣子車曰乃所願
則學孔子心學可暫息歟雖然洗心退藏心之體所以
具衆理知來藏往心之用所以應萬事體具者用必周
用孚審容膝之易安識洗心之微妙具有靜時體段則
動時工夫寧遽已乎於是著錄時傑所言以為記且叙
論心學期望來者詩人繼此而有作尚有徵云

湘陰縣學鄉貢題名記

湘陰為長沙屬縣舊有學在縣治南宋元祐初建崇寧
間徙縣治東

國朝因之洪武初肇新天下文教歲己酉重建廟堂齋
廡及聖賢像設理道用彰焉予往年嘗一過之見其水
灣四九近抱宮牆山據三湘遠森茶戟而文筆卓玉汨
羅涵輝黃陵白鶴神鼎玉筍之峯巒洞庭之波濤又皆
爭奇競秀掩映出沒于雲霞煙靄之外朝廷靈精莫薦
神彩秀氣盡來於學宮止聚信哉產梗楠之林壑集鳳
麟之郊致也而章甫逢掖之流游歌于茲帥道隆而友
誼篤長者崇禮法幼者習謙恭詩書講誦之聲無間所
夕歲時雋科名而登仕版者肩駢迹累為大楚以南稱

昔蓋自洪武迄今越三十餘科而領鄉薦者自夏忠靖公而下凡三十人升甲榜者自彭謙而下凡四人而魯文以發解第一人登第其盛矣歟就其中論之若忠靖公當國四十餘年功存宗社屢陟孤卿文章道德為世表儀沈魁好古博雅恪端師範彭謙正直剛毅不悔左遷吳昌有功方岳秦良相導親藩艾廩黎瑛王文彬愛民守法甘霖劉文徽文學政事著稱循良宋敏甘榮通經學古有光繼述魯文吳寅博洽清脩古永昌公平簡靜范奎廩介卓立此皆世所稱俊傑之士者而產於鄉校用於當時固宜流芳百世使不朽也天順初文徽以照磨楚雄陞通判調任鎮江滿考書最部使者援詔旌

異之得追贈其父母寢歷融顯而志敦本始謀勒貞珉
題鄉貢氏名于學舍為來者勸乃上京師屬予記之夫
稟二五之精而為人其得服儒衣冠游庠序譚經史則
人之秀者也至於策名科第顯融于時又人之最秀者
也以湘陰山川之靈異如彼風土之溫醇如彼而人之
最秀者獨甲乙他郡縣誠美且盛矣究其所以致茲美
盛又若不專繫於山川風土蓋必有所本焉誠以天理
在人心者不可泯沒而有

聖天子在上宗主斯文賢師友在下陶鑄多士其講學
脩德之功足以造就發揚之云耳前此羣賢固皆心乎
天理流聲華於勿替繼此而來者尚思儲休振烈勿昧

厥心哉講學以窮天理使其智明脩德以踐天理使其仁備而勇以斷之以立道德以建功名以守堅貞之節用扶植世道於悠久庶幾上不負

聖天子下無辱賢師友而山川風土將益炳煥其靈異涵煦於溫醇克積之久光輝發越殆又有如忠靖公之賢出焉其敬勉哉於是表歲以繫人備著羣賢姓字家世歷官履行之詳而虛其左方以俟來者凡邑大夫及儒師秀民贊其事者皆可錄也則列名于碑陰

望江樓記

武昌有望江樓郡守汪大本即煙波樓故址創之易以今名備登眺也近百年来物久斯壞險不可履然以都

會所建因山為城斯樓乃其最雄勝處長江如虹蟠遶其下有吞雲夢之勢英豪臨此懷抱莫舒焉都察院左僉都御史繁昌吳公巡撫湖廣之明年是為成化七年庶政大通顧瞻斯樓遂圖興復乃樽節公費之餘得白金五百兩市衆材僦工匠具稍食檄連帥王英衛侯張瑄撤而新之重建樓五間始辛卯十月凡三月而畢事其棟累為六尋其簷倍為三等其柱列為四楹升高梯倚立五檻延坐有庭而牕戶軒豁丹碧輝煌照耀郊原勝槩全楚暇日都憲公携小酌率連帥暨方伯杜銘憲使李敏性登焉長江遠漢奔馳數千里來會合軒墀下而四周青山大者列賓友小者羅兒孫各獻所有來助

勝遊而又有白雲宿簷牖日當檻清風徐動調暢琴歌
微瀾淨明蕩漾樽俎藩城萬人仰而望之咸以為神仙
公亦發浩興於九霄寄遐思於千古心與萬象趣同一
時信哉望江之多樂也維時左庶子黎淳適因賜告得
陪觴酌為說曰武昌之遊舊矣而江山勝事胡擾擾於
昔時乃怡怡於今日寧非以得其人而始勝哉當元季
世海內分裂傷哉斯土淪入偽漢者垂二十年我
太祖高皇帝既克九江殲漢渠魁而遺孽自立仍據武
昌師進圖之憑險不服明年甲辰鑾輿再駕武昌始下
方破敵時我師舉帆直指東南賊謂將攻望山門也盡
銳捍禦而天戈飛渡已壓烟波樓下俄頃漢陽門破生

擒遺孽然後湖南北江東西悉入版圖混一之基成矣
淳嘗陟降斯樓披圖觀地欲尋當時遺孽就擒之所而
故老皆無在者蓋天下之平久矣昔之敗壁頽垣荒榛
斷梗今皆變而為重門邃館脩竹茂林而吳蜀賈風
帆浪舶出入江濤浩渺之間輻輳閭閻民生不見干戈
安於畝畝衣食以養生送死夫孰知

上之功德拯救綏懷百年涵育若是之深且大也邪然
則斯樓也實惟用武之要區非我明受命

聖人出而四海一不能拔諸水火而登衽席之安非都
憲公經營再造貴於今時不足以昭

上恩而開千萬世之偉觀蓋交相濟者也後之諸侯登

曉斯樓豈能無感其朝宗忠敬之心曷有既乎都憲公
是其言且曰昔孔子在川上觀水流而見道體之無窮
人臣忠君即與道為體而不息者吾儕望江蓋法孔子
之觀水庶幾有得所謂乃所願則學孔子若元規轉宣
流連光景無閑名教烏足語是哉於是飲酒樂甚各賦
詩鏤諸樓中而四方詩人又繼此有作僉謂宣
上恩德及名臣善政與衆同樂乃吾民報本之意不可
忘也因書此告于後人

達縣科貢題名記

造化之生賢不擇其地人材之用世則因乎時方其一
元之氣流行兩間也絪縕磅礴充周無間而名山大川

炳靈毓秀適有以發其神焉則賢才於是乎生矣及夫
二五之精降形宇宙也英豪俊傑任使隨宜聖君賢相
言揚事舉又有以盡其用焉則世道於是乎泰矣山川
產之賴學校成其器君相用之藉科第顯其名此學校
之教科第之名二者於人材關繫尤重然非遇其時則
明揚路梗時也者尤賢才嘉會之要機不可無者也達
縣古宕渠縣東界漢析置宣漢縣隋升為通川郡宋元
降為達州我朝省州設縣負陰嚮陽翠屏北峙鳳凰南
來赤龍金華左右環列而大江橫前襟兌抱離而去縣
志云四山如城二水如帶誠嘉境也學在縣東尤專勝
槩古昔賢才產於斯以文事顯者有王汲李傳樂嘉聞

以武功著者有杜仁偉宗晏羅戩以節義聞者有林洙
袁沔以廉介稱者有楊震楊大中凡此諸賢史記志書
彬彬輦出皆山川秀發而又遇其時獲效用乃然耳洪
惟

皇明啓運光嶽氣完人才之生視昔加倍貞元會令千
載一時今內而列侍從司臺憲贊部署外而拜郡守縣
令及庶官有司者代不乏人人不乏材山川靈秀鍾成
俊產聲華耀於井絡功烈繼於襄區又非但如上世諸
賢一善見稱之比當此盛時不有紀載則前之往者何
所褒後之來者何所勸哉於是南陽陳襄經褐太學來
任典史慨然以題名為已任教諭臨川鄒鑑訓導華容

李正綱共成其美乃礱貞珉備勒我

朝科目之彥歲貢之英自洪武迄今宦遊中外姓名行
實功業始終各虛左方以俟來者而託吏科給事中唐
秉元請記夫氣化之資生資始悠久不息而賢才之賦
形賦性生育無窮今已仕者登名斯石道德功業行將
與穹壤共靈長日月同明盛永為壽物在宇宙間矣彼
未仕者脩德講學發軔於茲若雲初升騰輝膚寸且將
成章作繪布文采於天散而為霖雨以濟八荒若泉始
達細流涓滴且將盈科䟽派敷膏澤於地溢而為江河
以周四海則所以教而成之寧不有望於人乎吾輩教
禮隆義令不怠督勸授業解惑師不怠教戒使山川靈

秀發榮滋長全歸科貢而形著於事功無失今時之亨
泰凡來者皆獲薦名斯石碩不偉歟如是則豪傑生生
寧可限哉東元君子有學有守忠毅敢言材器出群故
因其請書此以坎云若夫奠安蜀之山川使各得所而
降神靈又吾儒究本之論尚有望於坐廟堂而論道者

大同府重建南門永泰樓記

禦戎無上策自治為上策安邊無善謀固守為善謀古
之賢將相遠猷經國凡備邊者既建嚴城即樹魏樓以
聳人觀瞻揚威萬里之外率專自治以固守為本不動
遠畧而忽邇圖也觀周宣王逐玁狁出太原而城彼朔
方延祚最久此非其明效乎秦則不然北築長城斥虜

千里用兵不息國隨以亡斯失之矣漢興雖鑒秦弊然
絕幕擒王不償報復渭上受朝無救衰微亦未為得也
邊防所關繫如此安可忽哉大同古雲中郡距京都九
百里其地最高為國屏藩洪武初因遼金故址築方城
析四門各起樓其上而環列小樓以便觀眺成化庚寅
夏南門災時總戎彰武伯楊信奏請脩葺義未克就歲
戊戌都察院右副都御史襄城李敏來巡撫提綱振目
百度既舉乃圖於總帥范瑾副帥孫鉞遊擊將軍李鎬
期一新之衆皆樂從於是鳩工簡材伐貞珉輦良木陶
渾甕鑿堅土給官廩取羨財定程期節力役而屬戶部
郎中陳清贊區畫知府周正司出納都指揮王昇董役

工千戶管鑑趙瑄韓英劉順職分理以是年三月經始
九月告終重建南門城樓疊為三層高累百尺直深五
丈橫廣七楹丹壁錦縈棟宇翬飛巍然凜然屹為巨鎮
曰扁題曰永泰樓暇日都憲公舉壺觴携將佐登焉一
覽衆山皆小惟斯樓獨尊上摩丹青下據雲朔其南擁
山河以壯

帝居紫氣接天其北曠沙磧以限戎幕白草彌望而紫
塞雄關西東連亘墩堡鱗集舉在目前虜使來朝貢過
其下者顛蹙備度膽隊羗驚隱然有虎豹在山之勢厥
功大矣都憲既為此乃給農具興稼政寬征歛積倉庾
以足其食脩車馬備器械厚衣糧完營壘以足其兵而

北境數歲寂無警焉明年繼陳清者戶部郎中冀綺來
徵記惟先王內夏外夷重門擊柝禦暴客也城郭溝池
守險固也今都憲公為此誠得自治之上策固守之善
謀而不背先王良法矣後之繼者安可隳厥成功哉其
必順天時察地利審人和以行吾仁義時訓練選精銳
重賞罰以全吾智勇遠斥堠量彼我謹誓約以堅吾威
信而以仁義為介胄智勇為干戈威信為戰陳則不戰
而屈人之兵上策善謀而百世恒在國家亦有賴也都
憲公端明溫厚高材博學舉進士甲科拜御史歷憲使
方伯進位都臺其在大同民錄善政流傳四方北虜聞
名畏服至於勸學興禮嘉績尤多予既序次始末乃祝

之曰昔張仁愿受降築城斯城岌岌實終大經暨李德裕籌邊起樓斯樓我我永與匹休將相協和我夷順治九圍一家

天子萬歲是為記

重創蒲圻縣治碑記

武昌稱蒲圻為鉅縣地富嘉山水有古人風比歲不幸紹位匪人老生以年授者耄荒不省務俗吏以幹遷者縱情不顧法胥徒益橫民困瘡痍

聖天子哀元元之久病特重其選成化辛卯春

詔以大學舉人定遠葛侯鳳儀知蒲圻擇而官之也吏部又請自今縣令績明召登朝著

勅旨諄切士氣增新侯初下車稽賦役苦如荼閱簿書
弊如髮名誥其官屬皆萎薊如醉庭積囂訟野多逋逃
侯嗟咨良久於是大新其典為之開以簡便自新之路
遇以難險可避之形布條設科量時制宜禁奢省費以
身倡率威令風行惠利川流未及再朞庶富可教爰觀
政事堂朽墜弗稱乃協謀僚佐鳩工簡材以壬辰十二
月重建廳事五楹崇廣各二十丈有畸深倍之後為退
寢中作串堂前樹儀門其楹各依廳事之數而崇減三
之一深廣隨宜門之內廡六房房之後舍羣吏闢門䟽
墉飾以丹碧琢石陶瓦繚以垣墉鼓鍾二楼卓立左右
巍然燁然雄觀楚邦前此侯又嘗堂齋師儒之學殿陛

先聖之宮庭實藩臬郡侯之館廟城隍以嚴保障墀壇
壇以禮神祇屋倉庫以備荒歉使命雖勤郵驛重義官
屬雖衆公署復完道塗雖遙橋梁再整以至祀社興學
養孤立院觀德起亭掇科豎坊凡縣治之制有關於今
者無一不撤而新之計其間總百六十有六稽其財通
費白金千兩米五百餘石量其力槩役夫六千餘凡二
年而畢民罔告勞政無遺憾經營器局超邁前人遠矣
先是黎淳既碑其城隍廟今嘉北成績乃復諭其民曰
惟

聖君奉若天道建邦設都賢臣欽遵德意制法興禮不
惟逸豫惟以理民而已爾蒲圻際今承平獲此賢令以

庶檢身以勤集事以寬厚容民物既足以綏懷蒸庶之
生又為之振古耀今飾茲縣治垂千百年之勝槩皆天
道所在今克奉之也爾民凡受恩者當思報感德者務
自脩庶幾仁讓興行俗還淳古爾於天道亦用遠矣民
皆肅摯曰信然既而庶官群屬生儒吏士封爵之賢致
政之老科第俊選耆英義夫之衆總百人踵門來告黎
淳曰賢令政蹟實在民心已嘗請于部使者褒揚其美
茲特求諸太史氏將壽其名俾為邑華夫紀載功德非
碑不可且使後賢觀法嗣而葺之實為我子孫無疆之
休彼於天道亦克奉之世濟美也黎淳不能却遂次第
其事俾歸而勒諸貞珉系以詩曰

帝式九圖天眷懋加洽于大順萬姓一家侃侃葛侯來
蒲正位匪心之期惟天是畏昔吏紛紛今吏恂恂侯能
馭之革武為仁昔民聒聒今民綽綽侯能撫之變憂為
樂昔閔倉庫粟帛空空侯來幾時倉積庫充新作蒲堂
聳民觀聽爰及百司畢完以盛侯作學宮冠冕我我紬
經繹史鹿鳴雅歌侯燕其僚代鼓考考亦有醪羞燕及
鰥老四野闢除侯出勞農春爾蠶眠秋爾稻豐衆人愛
侯賞其才傑太史曰非循吏以德侯克循良惟德動天
躋于津要

天子萬年

沔陽州重修儒學碑記

吾道在天下無古今之異惟以失其人而遂廢得其人而復興爾故物不終剝繼之以復事既有損受之以益況庠序設教以繼往聖開來學尤事物之至大者乎誠得其人必至於復而加益矣此吾道有待於人也沔陽建學在大江之北平地千里中衍廣原環水作城外瀦巨浸其舊學僻居州治西南

國朝洪武初徙置東北據其勝也然而地不踰四五畝屋不滿三十楹上漏旁穿人之定業潢流草長神罔降靈歷若干年未見作者茲幸邦家觀文成化比數年來知州延津呂侯文同知霑化孫侯景安用判餘姚邵侯性三君繼至咸務興學協謀戮力圖為作新而更目

盛學正盧執中訓導曾守靖魏宏生員何立等俱勤贊
助乃開拓疆土增加學舍揀選美材整葺殿堂靈星闕
門孔曼且頌黼黻備器既完且堅泮水舊惟土階今則
琢石砌為高梁兩廡舊皆木主今則搏土塑成體貌邵
侯又以聖像暨四配十哲顏容剝落捐財選匠塗繪金
碧張施五色各為木龕奉之吾道生輝益以亨通賢才
得所遂皆盛顯真為復還而加益矣癸巳二月邵侯告
于黎淳曰是當有記垂示後來為說曰淳聞古之坐者
兩膝著地因反其蹠而坐於其上漢文翁興學蜀郡有
石刻聖賢像至宋尚存漢去古未遠當是真實今聖賢
坐者皆伸兩足蓋後人為之也古之祀神臨祭設位題

木作主無有像設孔孟時釋奠皆然祭五祀亦惟以人
為尸耳今聖賢祭祀各有像設亦後人為之也雖然聖
靈在天享于克誠學者求道貴乎主敬能以誠敬為務
而躬行心得焉則聖人如親見矣豈必專求諸形像哉
斯舉也師得以安其位弟子得以安其業厥功甚偉而
吾提督學校按察副使莆田嚴公又於諸君子有教條
焉默識經書勸講學也崇尚廉耻勸脩德也諸君子克
遵其教條加誠敬之功則凡冠冕鄉闈壁奎天榜皆所
必得其進而立功名顯道德尚何難哉幸相與勗之呂
侯前令潛江邵侯舊丞無錫皆有政蹟今在沔陽尤治
行卓異甚獲乎上下云系以詩曰

茫茫雲土聖道寬洪浩浩漢江聖德流通鍾其地靈出
為人傑聚星于茲母隋爾業博文約禮基憲按之于勸
于懲

上帝鑒之氣機翕會爾時軒翥水濕火燥雲龍風虎諸
侯懋績太史琢詞

天子萬年永篤化基

大名縣重脩儒學碑記

孔子之道天也人君祇奉天命撫綏萬邦人臣寅亮天
功緝熙庶政士君子持循天理整齊百行何者非出於
天乎然皆取法孔子是故歷代師之建廟庭以祀焉報
其功也錫爵命以榮焉尊其德也官師儒聚秀彥以藏

脩待用焉行其學也凡此皆天道當然不可違者為政
不此之務斯其大棄天道於名教悖矣大名縣儒學舊
在縣西距郡城七里國朝洪武初建立今已百年餘成
化戊子冬錢塘任侯以丙戌甲科進士來為令始至申
嚴教典明年仲春釋奠于先師仰瞻廟宇光漏列星俯
視齋堂淖溢流潦而又規制庠隘百度榛荒自兩廡暨
重門列舍皆就傾毀大懼不任以墜教基既退惕焉興
嘆協謀改作有司所以亮天功者何在於是縣丞馬訓
典史趙弼檢官生儒一德一心徵土工木工石工金工
備器執用來會廟下削梁材醵柱礎陶甃甃築垣墉盡
撤舊儀恢度新制建大成殿五楹兩廡各十五楹戟門

靈星門各三楹生舍各十三楹繩其曲塗改為直道凡
百經費悉取足富而好禮之家小民不預也經始己丑
七月落成庚寅四月廟舍峻整階序廓弘行禮稱心講
道得所邑里秀民聞風嚮義悉來受教候攝衣登席開
釋與辭陳示本統文明既顯聖化用宣耆碩感悅咸願
勒文貞珉傳示久遠邑人汝陽郡太守張秉彛以書來
太史公曰大名觀苞舊國魏博故郡後唐建東京末晉
稱廣晉世教興廢與時盛衰至于宋季天道剝矣遂淪
沒夷虜凡二百七十有四年生靈塗炭莫甚於此幸我
太祖高皇帝龍飛九五一戎衣而定天下盡驅虜酋出
居塞外汎掃疆宇復還中原建學立師以養以教然後

大名之民始歸為華夏之民得見聖人天道之大功德
高厚孰可擬倫

列聖相承並厚栽培茲又得賢令尹易舊為新俾睎聖
賢各安其所凡我詩書禮樂之士游歌於此其可忽
太祖開拓之勲與賢令尹作新之蹟而罔知事事哉必
也平居則進德脩業圖出而經綸治功有事則舍生成
仁思起而日星節義至於製錦橫經之彥又皆正己正
人以是造就後賢匹休先正是則無悖於大者也人無
悖於天天必不違於人而凡奎壁鄉榜龍虎甲科者將
源源而出宰相與勛之侯名璜宇光弼立誠不尚華守
正不超勢有古循吏風既而此舉又剏繪聖賢遺像蓋

燕魯侯興教之美亦當有魯頌泮水之詩詩曰

惟此魏都昔淪夷貊去夷即華

高皇之烈惟此廟學仕侯始新簡賢仕能今

帝之仁帝謂任侯予之豪傑予仁魏民爾宣予澤侯拜
稽首有命自天曷盡我忠教化是先乃宏斯宮亦崇其
室予衿雲來不誠用歸侯祀闕庭冕服輝煌器用豐潔
崇報孔明侯升講堂經史唯喏冠冕縉紳雅辭開豁士
遵禮度民感休嘉天鑒俯臨獲福孔多

帝謂任侯予懋乃績爾當還朝為諸侯式侯績在天侯
德在民後之君子無廢舊勲伐山刊碑植于庭宇太史
作辭以贊攸始